



উপজেলা পরিক্রমা

সাতকানিয়া

সাতকানিয়া, ১৬ ফেব্রুয়ারী (শুক্রবার)।— আউলিয়া, দরবেশ ও পীর-মাশায়েখের পুণ্য স্মৃতিতে ধন্য, নৈসর্গিক সৌন্দর্যের অপূর্ব সমাহারে সমৃদ্ধ ও প্রাচীন মহাসড়ক 'আরাকান রোড'-এর ঐতিহ্যখ্যাত সাতকানিয়া উপজেলা চট্টগ্রাম জেলা সদর হতে প্রায় ৩২ মাইল দক্ষিণে অবস্থিত। এ উপজেলার উত্তরে চন্দনাইশ উপজেলা, দক্ষিণে লোহাগাড়া উপজেলা, পূর্বে বান্দারবান পার্বত্য জেলা এবং পশ্চিমে বাঁশখালী উপজেলা। সাতকানিয়া উপজেলার আয়তন ১০৮ বর্গমাইল। লোকসংখ্যা ১৯৮০-৮১ সালের গণনানুসারে ২,৪৯,৩৩৬ জন। এর মধ্যে পুরুষ ১,২৬,৮৫২ জন এবং মহিলা ১,২২,৪৮৪ জন। সাতকানিয়া উপজেলা মোট ১৭টি ইউনিয়ন নিয়ে গঠিত। ৭৩টি মৌজায় মোট ৭৫টি গ্রাম রয়েছে।

যাতায়াত
চট্টগ্রাম কক্সবাজার মহাসড়ক 'আরাকান রোড'-এ উপজেলার বুক ছুঁয়ে উত্তর-দক্ষিণে চলে গেছে। এ উপজেলার অধীনে মোট ৪৯ মাইল পাকা ও ৬৬১ মাইল কাঁচা রাস্তা রয়েছে।

শিক্ষা
উপজেলার মোট শিক্ষা প্রতিষ্ঠানের সংখ্যা ১৬৯ টি। এর মধ্যে ১টি সরকারী কলেজ, ১টি বেসরকারী কলেজ, ১৯টি উচ্চ বিদ্যালয় (বালক), ২টি উচ্চ বিদ্যালয় (বালিকা), ২টি নিম্ন মাধ্যমিক বিদ্যালয় (বালক), ১০১টি সরকারী প্রাথমিক বিদ্যালয়, ৬টি বেসরকারী প্রাথমিক বিদ্যালয়, ২টি কিণ্ডার গার্টেন, ১টি কামিল মাদ্রাসা, ৬টি সিনিয়র মাদ্রাসা, ২টি জুনিয়র মাদ্রাসা ও ৫টি এতিমখানা। এ উপজেলায় শিক্ষিতের হার ৩০%। এসব শিক্ষায়তনের একটি উল্লেখযোগ্য অংশ নানা সমস্যা জর্জরিত।

কৃষি ও বন
কৃষি-অর্থনীতি নির্ভর এ সাতকানিয়া উপজেলার মোট জমির পরিমাণ

৬৭৪১২.৭৬ একর। এর মধ্যে আবাদী জমির পরিমাণ ৩৪,৬৩১.০০ একর এবং অনাবাদী জমির পরিমাণ ১৬,৬৬৮.০০ একর। আবাদী জমির মধ্যে ৪,৪৩০ একর ৩ ফসলী, ২৮,৭৪৩ একর ২ ফসলী এবং ১,৪৫৮ একর ১ ফসলী জমি রয়েছে। সেচ সুবিধে নিশ্চিত করার জন্য ৪৬৮টি পাওয়ার পাম্প, ৪১টি গভীর নলকূপ এবং ৯৪টি অগভীর নলকূপ স্থাপন করা হয়েছে। প্রধান উৎপাদিত ফসলের মধ্যে ধান, আখ, গম, তামাক, আলু, সরিষা ও বিভিন্ন শাক-সজি উল্লেখযোগ্য।

চিকিৎসা
সাতকানিয়া উপজেলায় ১টি স্বাস্থ্য কমপ্লেক্সসহ ৬টি স্বাস্থ্য উপকেন্দ্র, ৩টি ইউনিয়ন পরিবার পরিকল্পনা ক্লিনিক এবং বেসরকারী ব্যবস্থাপনায় পরিচালিত ২টি দাতব্য চিকিৎসালয় রয়েছে। জনসংখ্যার আনুপাতিক হারে চিকিৎসা সুবিধে অপ্রতুল।

হাট-বাজার
এ উপজেলার ২৩টি হাট-বাজারের মধ্যে অধিকাংশ জরাজীর্ণ ও সেকেলে ধরনের। কেবলী হাটের জন্য কোন নির্দিষ্ট জায়গা না থাকায় আরাকান রোডের উপরই বাজার বসে সপ্তাহে দু'বার। ফলে বাস যাতায়াতে অসুবিধে সৃষ্টি হয়।

বিদ্যুৎ-পানি
এ উপজেলায় ২টি বিদ্যুৎ সরবরাহ কেন্দ্র থাকলেও বিদ্যুৎ বিদ্যুৎ জনজীবনকে অতিষ্ঠ করে তুলেছে। এ ছাড়া সাতকানিয়া উপজেলা সদরের মাত্র আড়াই মাইল পশ্চিমে বাবুনগর আলীনগরসহ প্রভৃতি এলাকায় এখনো বিদ্যুৎ পৌঁছেনি। পানীয় জল সরবরাহ নিশ্চিত করার জন্য ১১৫২টি হস্তচালিত নলকূপ রয়েছে। এ উপজেলায় পুকুরের সংখ্যা ৪,৬৫০টি। এর মধ্যে আবাদী পুকুরের সংখ্যা ৩,৮৭৫টি এবং মজা পুকুরের সংখ্যা ৯৭৫টি।